

Vg  
665



QK.

La



QK. 197, 28.

Ein gesprech vom den Scheinwercken der  
Geystlichen/vnnd iren gelübten/damit sy züner-  
lesterung des blüts Christi vermey-  
nen selig zü werden.

3 753

Vg  
665

Hanns Sachs  
Schüster.



ij. Thimot. iij.  
Ire thoheit wirt offenbar werden yederman.





Faint, illegible text at the bottom of the page, possibly bleed-through from the reverse side.



**D**er fryd sey mit euch ir liebenn brüder/  
gebt ewer heiligs almusen vmb gottes willen/den ar-  
men brüder zu Barfussen/die liecht/darbey wir  
singen vnd lesen. Peter. Ich gib keinem solchen starcken  
betler ychts/wan das betteln ist verboten. Deute. xv. spricht  
gott. Kein betler soll vnter euch sein/ich wil mein liecht woll  
hauff armē nachpawrri gebē/die arbeiten darbey. Münch  
Ich hör wol/ir seyt Lucherisch. Pet. Neyn/sonder Eua-  
gelisch. Münch. Ey so thut auch/wie das euangeli lert/  
nemlich/Math. v. yederman der dich bitt/dem gib/vn Luce.  
vi. Seyt barmherzig/wie ewer hymlicher vatter barm-  
herzig ist/vnd Luce. xi. Gebt almusen von ewer hab/so ist es  
euch alles rein. Hans. Brüder Heinrich hat dich schon  
vberwunden mit schrift. Pet. Ich bekenns/ich kan nit  
weyter/kumpt her lieber brüder Heinrich/seht hyn ein pfen-  
ning vmb gotswillen/vnd kaufft euch selber ein liecht nach ew-  
rem syn. Münch. Ey behüt mich got/ich darff kein gelt  
nemen/es helts mein orden nicht innen. Hans Wer hat  
ewern orden gemacht? Münch. Unser heyliger vatter  
Franciscus. Hans. Ist dan franciscus ewer vater? spricht  
doch Christus Math. xxiij. Nyemant soll sich vatter heissen  
auff erden/dan einer ist ewer vater/der im hymel ist. Mün.  
Ey das wissen wir wol/er hat vns aber gelert/wie ein frum-  
mer vater sein kindt. Hans. So ist er ewer meyster/spricht  
doch Christus an gemeltem capitel. Ir solt euch nit lassen  
meyster nennen/dann einer ist ewer meyster Christus. Auch  
spricht Christus Joan. xiiij. Ich bin der weg/die warheit/vn  
das leben. Vnd Joan. x. Ich bin die thür zu den schaffen/wer  
anderßwo einsteigt/der ist ein dieb/vnd ein mörder. Mün.  
Ey ir versteets nit recht/er hat vns nit auß seinem eygen  
kopff gelert/sonder all sein regel auß dem heyligen Euan-  
gelio gezogen. Hans. Wo steet dan im Euan gelio. Ir solt  
kein gelt nemen oder anrüren/ich wil euch wol das widerspil

zeygen. Münch. Wo? Hans. Math. xvij. sprach chri-  
stus zu Petro. Gee hin ans mör/vnnd würff den angel auß/  
vnd der erst visch der auffer firt/den wirstu im maul finden  
ein guldene münz/ die nym vnnd gibs für dich vnnd mich.  
Münch. Es steet aber Math. vi. Ir solt euch nit schetz sa-  
meln auff erden/vnd weyter. Ir könt nicht got dienen vnnd  
dem Mamon/Vnd Lu. xij. Hüret euch vor dem geytz/wann  
niemandt lebt daruon das er voll genüge han/an seinen gü-  
tern. Vnd Luce. xvij. Wie schwärlich werden die reichen in  
das reich gottes kommen/vnd Math. xix. Mar. x. Lu. xvij  
Wiltu volkōmen sein/so gee hyn/verkauff was du hast/vnd  
gib es den armen/so wirstu ein schatz im hymel sammeln/vnnd  
kum vnd volg mir nach. Da habt ir grundt vñ vrsach auß  
dem Euangelio vnser willigen armut. Hans. Wol geredt  
halt ir Barfusser das? Münch. Ja/wir nemen kein gelt/  
so han wir keins/weder wenig noch vil. Hans. Ja ir habt  
aber außserhalb dem Closter ewer einnemer vnnd außgeber/  
wie die Fürsten/vnd samlet (vnder dem schein der willigen  
armut) grosse schetz/vnd kauft Cardinal hüt vmb vil tau-  
sent Ducaten/vnd pawet köstliche Clöster/wie die Fürsten  
hewser/wie am tag ist/heist das nit schetz samlen/gelt nemen  
oder anrüren/so weyß ich nit wie ichs nennen soll. Peter.  
Es heyst des geytz vnder dem hütlein gespilt. Münch. Ey  
lieber/es ist nit so heffrig/es ist war/wir haben schaffner/die  
lassen wir mit vmbgeen/wir bekümmern vns aber gar nichts  
mit dē gelt/vñ warten vnser gotsdiensts. Hans. Spricht  
doch Christus Math. vi. Wo ewer schatz ist/da ist auch ewer  
hertz/ Derhalb ist ewer hertz im Closter nit/sond etwan in ei-  
nes burgers hauß/bey ewerē schatz/darüb könd ir got nit die-  
nen/weil ir dē mamon dient mit dē hertzen/darauß volgt wei-  
ter/das ir kein gnügen an ewern gütern habt/wie dan Lu.  
xij steet/sonder petlet vñ rasplet steets der welt güter zusam-  
men/wie werdt ir dann in das reich gottes geen/durch ewer  
armut/der ir euch rümet. Münch. Ey lieber meyster/wir

verlassen das vnser williglich/solten wir darnach nit wider  
von frummen leuten das heylig almusen nemen. Peter.  
Ja/ ewer mancher verlest kaum eins gulden werdt/ vn̄ dritt  
in ein pfründ/wol. cc. gulden werdt/ ist sein lebenlang mit al-  
ler notdurfft versorget/ vnd weyß von keiner armit zusagē/  
sonder schneit den armen Christen das prot vor dem munde.  
ab. Petrus hat euch verkündt. ij. Petri. ij. Sy führen ein zert-  
lich leben von ewer lieb/ vnd zeren wol von dem ewern / das  
heist ye nit das sein verkauffen/ vn̄ den armen geben. Mün.  
Habt mir nicht in vbel/ir vnd ewers gleichen gebt vns nit  
vil/sonder grosse Herren/vnd reiche Burger/vnd Kaufflewt  
ndren vns von irem vberfluß. Peter. Ist gut/wo nemen  
es dieselbigen/allein bey vnns/ wir die eylff tausent mertrer  
mussens zalen/da sy vns betriegen/ vbernöten/dringen/zwin-  
gen/das oft das blut hernach möcht gan/da speysen sy dar-  
nach euch heylosen vätter (heilige vätter soll ich sagen) mit/  
die starck vnd fatil seind/vnd selber wol arbeiten/vn̄ andere  
arme Francke Christen mit iren erneren möchten. Hanns.  
Ja wo ein Christlich liebe in ir were/wie Paulus schreibet. ij.  
Tessalo. ij. Wir haben nicht vmb sonst das brot genommen  
von yemant/sonder mit mühe vnd arbeit hab wir tag vnd  
nacht gewürckt/auff das wir nyemāt vnder euch beschwer-  
lich würden. Vnd weyter. Wer nit arbeit/ der soll nit essen.  
Münch. Stet nit. j. Corinth. ix. Wissen ir nit/die im tem-  
pel schaffen/die neren sich des tempels / vnd die des altars  
pflegen/die geleben des altars. Hans. Es stet aber gleich  
im Text hernach. j. Corin. ix. Also hat der herr beuolhen/die  
das Euangelion verkündigen/ sollen sich vom Euangelio-  
neren. Aber wie ir sagt/des tempels vnd altars diener halbē  
ist im alten testament im prauch gewesen/wie Leui. vii. Aber  
nun vergangen/wann im newen Testament haben wir kei-  
nen leiplichen tempel/von holz vnd stein/sonder wir selbs  
seind der tempel gottes/wie. j. Cor. iii. Wissent ir nicht/das ir  
der tempel gottes seyt/vnd der geyst gottes in euch wonet.

Derhalb dürffen wir Keins tempel Knechts mer. Auch haben wir Keinen Altar zum opfer / derhalb dürffen wir Keins altar dieners mer / wann Christus ist allein hoher priester / wie Hebr. vij. Der sich selb ein mal für vns geopffert hat. Derhalb dürffen wir im newen testament nur diener züverkündigen das heylig euangelion / darzū dan Christus seine jüngere außschicket. Marci ultimo. Geet hyn in die ganze welt / vnd predigt das Euangeli allen creatur. Dieselben meint Paulus / sollen darvon enthalten werden / ir aber esset ewer brot in müßig geen / wider den willen gottes Gen. iij. Im schweyß deines angesichts soltu niessen dein brot. Münch. Ey verkündigen wir euch doch auch das Euangelion / derhalb wie Mat. x. Ist ein arbeiter seins lons würdig. Hans. Ja es seind ir vnder euch / aber leyder ye nit vil / die Christum rein predigen / sonst liegen ewer ganze Clöster vol obeinander / vñ seyt weder got / noch der welt nüg. Münch. Ich meyn ir seyt vnßinnig / was thünt wir sunst tag vnd nacht / dan das wie got dienen? Hans. Ja ir steckt vol gotßdienst / vnd guter werck / vnd fellet doch vñ aller nöttigsten wercks / das Christus fodern wirt am letzten vrtail. Mat. xxv. nemlich die werck der barmherzigkeit. Ich bin hungerich gewesen / vñ ir hant mich nit gespeysset. 2c. Münch. Lieber / geben wir dan kein almusen? Kommet morgen vmb mittag für vnser Closter / da wert ir ein hauffen armer lewt sehen / die wir täglich speisen. Peter. Ja ir gebt in speyß heraus / die ir nit mögt / vnd schüttet in suppen vnd arbeits / Krawt vnd visch schuppen vnder einander / schämt ir euch nit / das ir dem herren Christo ein sollich geschlepper zü essen gebt? wann er spricht Mat. xxv. Was ir den minsten auß meinen than habe / hand ir mir selbs than. Münch. Ja ich bekens / vnser leiplich almusen ist klein / aber die geistlichen tröstung teilen wir auß / wer vnser begert. Peter. Ja ir geet wol gern zü den Francken / man lonet euch ewer geng auch wol / wo ir aber vergebens mit einem geet / vnd in tröstet / steet sein sach



gewißlich nit wol/darzu ißet man nit wol von ewern guten  
worten. Hans. Es steet aber. j. Joan. iij. Wer diser welt  
gütter hat/vnd sieht seinen brüder not leyden/vnd schleüßt  
sein hertz vor jm zu/wie bleybt die lieb gottes in jm. Vnd wey-  
ter. Meine Kinder/laßt vns nit lieben mit worten/noch mit  
der zungen/sonder mit der that vnd mit der warheit. Nun  
vermöcht ir wol/manchen armen enthalten/ir geet aber vor  
den armen fürüber/wie der priester vn leuit bey dem verwun-  
ten fürüber gingen Lu. x. Vnd wo nit wir weltlichen (von  
euch verachten Samaritanern) in zu hilff kemen/so musten  
sy ewrenthalb (wie der arm betler Lazarus/vor des reichenn  
manns hauß/Lu. xvi.) verschmachten. Münch. Wir  
haben warlich nichts zu gewalt/wir seind geistlich personen  
darumb spennten wir nur geistliche güter auß/vnd das wil-  
liglich. Peter. Ja ir spennt ewer Vigilg/Seelmessen/vn  
alle ewer gotsdienst miltiglich genug auß/wie ich mein Se-  
mel/vnd meyster Hans seine Schüch/doch mit der vnder-  
scheyd/wer kauft der hat. Vnd precht einer ewerm Seckel  
dario. v. gulden für ein opffer/vnd felet vmb ein ort/er nem  
das gelt nit/keme mit jm für recht/Also miltiglich gebt ir  
ewre gutte werck von euch. Münch. Behüt euch got/  
wir verlieren die zeyt vnnützlich da bey euch/wir müssen wey-  
ter gan/da man vns etwas gibt. Hans. Lieber brüder  
Heinrich/sagt mir noch ein wort. Münch. Was istz?  
Hans. Haltent ir ewige Keuscheit/wie ir dan gelobt habt?  
Münch. Ja/warumb nit/wüsten wirs nit zuhalten/wir  
gelobtens nit. Hans. Spricht doch Christus Mat. xix  
Das wort fasset aber nit yederman/sonder den es geben ist.  
Da meynet ye Christus/Keüsch zuleben/steet nit in eygenem  
gewalt/sonder muß von got geben werden. Peter. Irer  
Keuscheit werden die pewrin wol gewar/wann die münch keß  
sameln. Münch. Wo habt irs in vnserm orden erfahren?  
Peter. Ich mein euch allein nit/sonder alle Bettel münch  
die da keß sammeln. Münch. Ja wann schon ein vntraug

vnder einer so grossen versammlung ist/wie kann man den  
hauffen darnach vtheilenn. Hanns. Ich hab sorg / ob ir  
euch gleich der natürlichen werck enthalt / besudelt ir euch  
doch in andre vnzimliche wege. Münch. Ja da muß mā  
das fleisch casteyen/vnd ist schyr die gang Regel vñ Statut  
darauß gericht/das fleisch zū dempffen. Hans. So ist  
durch Paulum von ewer Regel vnd Statut gesagt. Colos. ij  
Zast euch nit fangen mit sayungen/die wol habē ein schein  
der weißheit/durch selb erwelte geistlicheit vnd demüt/vnnd  
durch das sy des leibs nit verschonen/vñ an das fleisch kein  
kost wenden zū seiner notturfft. Peter. Von nöten seind  
die münch so mager/vñ die pawern so feyst/die fasten nicht  
soul als die münch. Münch. Es ist nicht als vmb das  
fasten zuthun/es seind vnser casteyung mancherley. Pet.  
Lieber brüder Heinrich/erzelt vns ein teyl: Mün. Gern/  
Wir tragen vnden nicht leines an/gürten vns mit stricken/  
vnd geen parfuß in zū schnitten schuhen. Wir tragen auch  
kein har auf dem kopf/wir baden auch nit vnser lebenlang/  
biß nach dem tode. Wir liegen auch auff keiner feddern/wir  
zyhen vnns auch nit gar ab / so essen wir kaum halbe zeyt  
fleisch/vnd essen auß keinem zyn/vnd müssen etliche zeyt Si  
lentium halten/das heyst schweygen/wir müssen auch alle  
tag wol ein stund oder. v. im Chor steen vnd knien/vnnd alle  
nacht gen metten auff. Peter. So muß ich mit meinen  
Knechten den ganzen tag arbeiten/vbel essen/vnd legen vns  
offt kaum vmb metten zeyt nyder/da singen mir dan meine  
kynder oft erst metten/ich hab vil ein hertern orden dann ir  
Münch. Ja wann ir da weret/wenn wir Capitel halten/  
würde euch das lachen wol vergeen/wenn ir die ruten hörten  
singen. Peter. Ir halten nit hynan mit den ruten/ir  
macht nur ein spiegel fechten/es thut nichts. Münch. So  
legt man aber einen in die Pressam/vnnd lest in verfaussen.  
Hans. Si ir blinden/wie füret ir einander in ewern ertich  
ten vnhilfflichen menschen werckenn. Münch. Spriche  
doch got

doch got/mensch hilff dir/so wil ich dir auch helfen. Hans  
Wo steet das geschrieben: Also kumpt ir mit ertichten sprü-  
chen herfür/das steet aber wol geschrieben Dsee. xiiij. O Israel  
in dir steet dein verderben/ vnd in mir allein steet dein hülff.  
Darumb hilfft ewer gleyßnerisch weiß nit zur dempffung  
des fleischs/wan es steet Gene. viij. Des menschen hertz ist vo-  
jugent auff geneygt zur bößheit/ Darumb steet Prouer. xx.  
Wer mag sprechen/ mein hertz ist rein. Nun habe ir essen/  
trincken/ vnd schlaffen den vberfluß/ vnd feyrent dennocht  
darzū/daruon sich dann die eingepflanzte natur engündet  
wann das wort Gene. am. j. vnd. ix. steet fest. Wachset vnd  
meret euch/derhalb ist (on sondere hohe gnad gottes) ewer  
hertz besleckt mit bösen prinnenden begyrdten. Münch. Ey  
so wir nur nit darcin verwilligen/so verdienen wir mit solchē  
anfechtungen. Hans. Ir spilent aber im herten mit sol-  
chen gedancken/wie ein katz mit der meiß. Nun ist got ein  
erkündiger aller herten/wie Actium. j. Derhalb vrteylt got  
nach dem herten. Darumb spricht Paulus. j. Corinth. vij.  
Es ist besser heyraten dann prinnen. Vnd im selben Capitel  
so ein junckfraw heyrat/so sündiget sy nit. Münch. Ja  
wir haben aber ewige keuscheit gelobt in vnser profess/mit  
samt williger armut/vnd heyliger gehorsam. Hans. Ir  
hört aber wol/ ir halt ir nit volkommenlich/warumb habt  
ir ein ander gelübdt auff euch genömen/vnd habt euch nit  
ander Tauff benügen lassen/darinn ir dem teuffel/vnd alle  
seinem geschpenst widersaget habt. Münch. Ey das ist  
die ander Tauff/darinn man vns auch andere namen geyt  
da werden wir widerumb newe geboren. Hans. Spricht  
doch Paulus Ephe. iij. Es ist ein herr/ ein glaub/ ein tauff/  
ein got vatter vnser aller/ derhalb ist ewer tauff kein tauff/  
sonder ein ding von menschen erticht/welche alle lügner sind  
psal. cxv. Darumb geet ir auch mit menschlicher lügenhaff-  
tiger weiß vmb/halt keuscheit ebē/wie die armüt/ Ich glaub  
es sey mit ewer gehorsam auch also. Münch. Wie/halt  
B

wir nit volkōmenlichen gehorsam: es geet vnser keiner für  
das Closter on erlaubnis des würdigen vatters Gardian.  
Hans. Ja ir halt gehorsam in den dingen/die ir gern thut/  
aber erwan doch mit vnwilligem hertzen gegen ewern ober-  
sten/doch ist das nit die rechte gehorsam/so die schrift von  
vns fodert. j. Petri. ij. Seyt vnderthan aller menschlichen  
ordnūg/vmb des herren willen/dem König als dem obern 2c.  
vnd Rom. xij. Seyt vnderthan aller weltlichen oberkeit/vñ  
weytter so gebt yederman/was ir schuldig seyt/dem Schoß/  
dem das Schoß gepürt/dem Zoll/dem der Zoll gepürt. Vñ  
Matth. xxij. Gebt dem Keyser/was des Keyfers ist/vñnd got  
was gottes ist/Von dieser gehorsam aber die gott wil habē/  
habt ir euch fein außgeschleyfft/vñnd habt ein eygene ertich-  
te gehorsam angenommen/darīn ir frey seyt von allem frō-  
nen/zehenden/rayßgelt/wachgelt/Stewergelt/zynßgelt/le-  
hengelt/zollgelt/vngelt/vñnd allen pürden/so wir alle brüder-  
lich vnder einander tragen. Mūnch. Ey wir seind geist-  
lich personen/vñnd auß der welt/derhalb seind wir auch ge-  
freyet von den weltlichen Tributen. Hans. Von weme?  
Mūnch. Von dem allerheyligisten Bapst Honorio/dem  
dryten/vñnd vom Keyser Friderich dem. ij. vor. ccc. jaren/wolt  
ir Lutherischen vns erst Reformieren. Hans. Es hat  
ein blinder den andern gefürt/wie Lu. vj. So ein blinder den  
andern fürt/fallen sy nit beyde in die grūben. Sagt mir eins  
warinn doch ewer gehorsam gegründt ist. Mūnch. In  
vnser Regel vñnd Statut/wie sy dann von wort zū wort an-  
gezeygt seind. Hans. Nun ist ye ewer Regel vñnd Statut  
nur von kuttē/platten/stricken/schūhen/fleisch meyden/  
schweygen/singen/lessen/mettengeen/Chorsteen/bucken/kniē  
vñnd solchen eusserlichen ertichten wercken/Derhalb geet der  
sprūch stracks auff euch Matthey. xv. Vergeblich dienen sy  
mir/dieweyl sy leren solche lere/die nichts dan mensche gepot  
seind/Vñnd weytter/Alle pflangen die got mein hymlicher  
vatter nit gepflangt hat/werdenn außgerewt. Mūnch.

Seind dann solche vnser geystliche vbung nit gut? Hans.  
Neyn. Münch. Wie so? Hans. Da hat sy got nit  
gepotten noch geheysen. Münch. Ey/ wir thuns aber  
gutter meynung/got züeren. Hans. Got lest im nichts  
gefallen/dann was er geheysen hat/wie Leu. x. Da Aarons  
sün Nadab vnd Abihw/fewer in ir nepff namen/vnd wolte  
vor dem herren reüchern/da verprennet sy das feuer des her  
ren/darumb/das sy mit frembden feuer reüchern wolten/  
das got nit gepoten het/vñ thätens doch auch got züeren.  
Nun seind ye ewer orden lawtter/frembder/erdichter gotts  
dienst/im schein außwendig heylig vnd gleyssent/innwendig  
aber im grund lawtter wurmstichig/vñ betrieglich gespenst  
wie Mat. xxiij. Wee euch gleyssern vñ heuchlern die ir seit  
wie die geweiffeten todten greber/welche außwendig hübsch  
scheynen/innwendig aber seind sy vol todten peyn vñ vn  
flats/also auch jr/ außwendig scheynet ir frum/innwendig  
aber/seyt ir vol heüchlerey vnd vntugent. Münch. Ey  
lieber/war mit? Hans. Ir habt es wol zum teyl gehort/  
ir haltet armüt on mangel/vnd keuscheit die besudelt ist/vñ  
gehorsam/die erticht ist. Münch. Sagt was ir wolt/wir  
haben ye den volkōmen standt/dem euangeli nach Mat. xix  
Wiltu volkōmen sein/so verkauff was du hast zc. Hans  
Ey das muß geistlich verstanden werden/also/das wir vn  
ser hoffnung vnd trawen nit auff das irrdisch segen/sonder  
allein auff got/wie Paulus beschreib. i. Corinth. viij. Lieben  
brüder die da weyber haben/die seyen als hetten sy keine/vnd  
die da kauffen/als behielten sy es nicht/vñ die sich dieser welt  
gebrauchen/als prauchten sy ir nicht zc. Das ist auch gut  
bey dē zünercken/wir kōnden ye nit alle das vnser verlassen/  
vñ münch werden/wer wolt zuletzt koren pawen. Nun muß  
sen wir ye alle volkōmen sein/soll wir in das reich gottes  
kommen/wie Apocali. xxi. Es wirt nichts unreins hynem  
geen inn das hymlich Jerusalem. Peter. Ey die Obser  
uanger haben einen beyweg gefunden/wenn wir Zeyen ster  
B ij

ben wollen/so ziehen sy einem ein grawe Kutten an / machen  
erst ein münch auß jm/schern vnd baden in/so firt er dann  
als ein voller (ein vollkommer soll ich sagen) gen hymmel/wie  
ein Eiw in ein meißloch. Hans. Lieber brüder Heinrich  
was hat euch in den orden prache? Münch. Das ich se  
lig werd/wie vns dan in der profesz verheissen wirt. Hans  
Hofft ir durch ewre münchwerck selig zu werden. Münch  
Ja was wolt ich sonst im Closter thun. Hans. Spricht  
doch Paulus Ephe. ii. Auß gnad seyt ir selig worden durch  
den glauben/vnd dasselbig nit auß euch/es ist gottes gab/vñ  
nit auß den wercken/auff das sich nyemant berüme. Mün  
Verheist doch Christus an vil enden die werck zubelonen/wy  
Math. xxv. Luce. vi. Ioan. v. vnd Paul. j. Corint. iii. Hans  
Da nympt man die werck für den glauben/ darauff sy ge  
flossen seind/das ir es aber klarer versteet/das got die werck  
nit belonet/so höret Christum selbs Luce. xvij. Wann ir alles  
than habt/was euch beuolhe ist/so spricht/wir seind vnnütz  
Knecht/wir haben gethan/das wir zuthun schuldig waren.  
Die hört ir/das durch die rechtgeschaffen Christlichen werck  
nymant nichts verdient/wann es spricht Esa. lxiii. Unser  
gerechtigkeit ist als ein unrein thuch einer Francken frauen  
wie wolt ir dann durch ewre selb erdichte eygemüzigige werck  
selig werden. Peter. Wie besteet ir nun mit ewer Kauffmā  
schatz/der euch vil vbrig ist gewest zu der seligkeit/die ir vns  
verkauft habt. Münch. Solt ich dann wissen/das ich  
nit selig würd durch mein Clösterlich leben/ich wolt mein Kut  
ten an ein zaim hencken/vnd mit stein darzu werffen. Pet  
Ey so geet auß dem notfall. Es steet ye Matth. xxi. Die hü  
ren vnd offenbaren sündler werden euch vor geen in dem hym  
melreich. Münch. Dich bin nun alt/vnd kan nichts/  
was wolt ich anfahen. Hans Ich wil euch ein holzha  
cken schencken/das ir euch mit arbeit erneret. Münch.  
Ich darff ir nit. Hans. Wie so? da würdt ir erst rechte  
ware armut empfinden/vñ würdt euch die vnkeuscheit ver

geen/vnd erst recht gehorsam werden yederman. Münch.  
Neyn/neyn/ich weyß besser im Closter. Hans. Ich hör  
wol/ir seyt der leüt da Paulus von sagt. j. Philipen.ij. Die  
feindt des kreuzs Christi/welcher end ist das verdammus/  
vnd denen der pauch ein got ist. Also fürcht ir die armüt/  
vnd habt sy doch gelobt/vñ pleybet vber erkantnus der war  
heit inn dem irthumb. Münch. Ich höre zwar nit vil  
guts von den außgelauffenen münchen sagen/sonder wie sy  
schönen frawen nachgeent/vnd vnder.x.kaum einer gern ar  
beit/vñ popigen sonst/einer das/der ander yhens/darmit sy  
sich on arbeit ernerer mögen/so geent irer eins teils sonst bö  
sen stücken nach/wie kan sy dann ein guter geyst auß den  
Clöstern driben habenn. Peter. Dabey erkent man/was  
guts in den kütten steckt/die vor in Clöstern haben gelebt wy  
die lebendigen heyligen/die leben nun herauffen wie die lotter  
büßen/vñ haben doch eben das im hergen gethan im Closter  
das sy her auß thunt mit wercken. Hans. Ich hab aber  
leyder sorg/vil lauffen auß den Clöstern/auß fürwitz/müt  
willen(ire böse lust in der welt zubüssen)vnd doch wider ir ey  
gen gewissen/das kan nit auß dem glauben geen/was aber  
nit auß dem glauben geet/das ist sünd. Rom.xiiij. Dieselben  
füren darnach ein böß leben/ir gewissen wirt sy aber wol an  
klagen/geschichts yegund nit/wirt es in tods nöten nit da  
hinden pleyben/Got erbarm sich ir/welche aber durch erkāt  
nus des wort gottes ir thöricht gelöbt vntüchtig zuhalten  
erkennen/vnd mit freyem sicherem gewissen geent auß dem  
standt/von menschen eingesetzt/vñ dretten in den stand von  
got eingesetzt/nemlich in die Ehe/ Gene.ij. Der mann wirt  
vatter vnd muter verlassen/vñ seinem weib anhangen. Vnd  
welche sich also neren mit arbeit/darzü sy(wie der fogel zum  
flug) geporen seind. Job.v. Dieselbigen kan ich ye nicht vn  
recht vrteilen. Münch. Ich wil ye nit her auß/vnd ob  
sant Peter sprech/es wer nit vnrecht. Hans. Ir seyt eben  
der rechten einer/darvon Esa.sagt am.vj. Er hat ire augen  
B ij

verblendet/vnd ire hertz verstocket/das sy mit den augen nie  
sehen/vnd mit dem hertzen nit vernemen/vnd sich bekerten/  
das ich sy selig mecht. **Münch.** Ey lieber/ sein wir dann  
so inn einem gefährlichen stand/wa für halt ir vnns doch.  
**Hans.** Ich halt euch für die leüt/darvor vns Petrus war  
net.ij. Petri.ij. Es werdenn falsche leter vnder euch sein/die  
neben einführen werden verderbliche Secten/vnd verleicken  
des herren/der sy erkauft hat/vnd weyter das ganz Capi-  
tel sagt von ewer verführung. **Münch.** Lieber/das ist vō  
vns nit geredt/wo verlaugnen wir Christi des herren? Hās  
Ir verlaugnen seiner erlösung vnd selig machung/vnd wolt  
euch durch ewre scheinwerck selig machen/vñ weyset andere  
leüt auch von Christo/auff ire eygene werck die seligkeit zuer-  
langen/vnd verkauft symoneyscher weiß die gutten werck.  
**Mün.** Ey lieber/ir seyt vns sunst feindt/darumb schmecht  
ir vns. **Hans.** Neyn/bey meiner seel heil/ allein auß brü-  
derlicher lieb. **Münch.** Lieber seyt ir dan Euangelisch  
so dürfft ir nit so spötlich mit vns handeln/wann ir müßt  
von yedem vnnügen wort rechenschafft geben am jüngsten  
gericht mat.xij. **Hans.** Ir wolt die schrift nit annemen/  
da sy von euch sagt/darumb müssen wir euch mit ewer eyge-  
that(welch an ir selb spötlich vnd lecherlich ist) vberweyten/  
das ir die jenigen seyt. **Münch.** Wem ist aber mit beholf-  
fen? **Hans.** Euch/ob ir euch(durch sonil anzeygung)  
doch einmal selber im grundt erkentē/wie ellend/blind/hart  
selig lewt ir wert/vnd nit also hochfertig mit dem gleyßner  
im tempel math.xvij.ewre werck rümet/vñ darauff bochet  
selig zu werden/sonder demütig mit dem offenbaren sündler  
spricht/Got biß gnedig mir armen sündler/vñ würdent  
erst recht geist arm/hungrich vnd durstig/nach der gerecht-  
keit gottes math.v. Dann würdt ir erfüllt mit gütern/wie  
Luce.j.das ist mit dem vnerforschlichen schatz Jesu Christi/  
Ephē.ij. Welches seind die tröstlichen zusagung Christi/  
die würdent euch erst wol geschmack vnd angeneh werden.



Darumb lieber brüder Heinrich was ich vnd mein brüder  
Peter mit euch geredt haben/ist im besten(on allen neyde vñ  
hass)geschehen/wolt got es hettens alle münch gehört/auf  
allen orden/vnd bitten euch vmb gottes willen/vnns nit zu  
uerargen/ob wir etwas zuuil hart wider euch hetten geredt.  
Peter. Sehin lieber brüder Heinrich zwey liecht/vnd leser  
darbey nit Scotum oder Bonauenturam/sonder die Bibel  
etwann wirt euch got auch erleuchten mit seinem götlichen  
wort/vnd habt vns nichts in vbel. Mönch. Nichts lieben  
brüder/ich wil den dingen weiter nach suchen/wir geen dar  
hyn. Got sey mit euch. Peter. Amen.

Isaie. lix.

Sy sollen auch von iren wercken nit bedeckt  
werden/vnd ire werck seind vnnüge werck.

Faint, illegible text, likely bleed-through from the reverse side of the page.

79 665 M

Et sollen auch von dem wirt zu nit bedacht  
der dinsten we wirt sein zunge werch


M. C.



X 220703A







28.  
gespreech vom den Scheinwercken der  
Geystlichen/vnnd iren gelübten/damit sy züner:  
lesterung des bluts Christi vermey:  
nen selig zü werden.

2753  
Vg  
665

Hanns Sachs  
Schuster.



ij. Thimot. iij.  
Ire thoheit wirt offenbar werden yederman.

